

mine sic orsum : « iam sibi satis gloriae quaesitum, et potuisse se desidere, ni animus inquies pasceretur opere ». Profecto enim populi gentium uictoris et Romani nominis gloriae, non suae, composuisse illa decuit ; maius meritum esset operis amore, non animi causa, perseverasse et hoc populo Romano praestitisse, non sibi.

XX rerum dignarum cura (quoniam, ut ait Domitius Piso, thesauros oportet esse, non libros) lectione uoluminum circiter II, quorum pauca admodum studiosi attingunt propter secretum materiae, ex exquisitis auctoribus centum inclusimus XXXVI uoluminibus, adiectis rebus plurimis, quas aut ignorauerant priores aut postea inuenerat uita. Nec dubitamus multa esse quae et nos praeterierint. Homines enim sumus et occupati officiis subsiciuisque temporibus ista curamus, id est nocturnis, ne quis uestrum putet his cessatum horis. Dies uobis impendimus, cum somno ualetudinem computamus, uel hoc solo praemio contenti, quod, dum ista, ut ait M. Varro, musinamur, pluribus horis uiuimus ; profecto enim uita uigilia est. Quibus de causis atque difficultatibus nihil auso promittere, hoc ipsum tu praestas, quod ad te scribimus : haec fiducia operis, haec est indicatura. Multa ualde pretiosa ideo uidentur quia sunt templis dicata.